

# Sport

Journalistar: Stig Roger Eide tlf. 911 49 815. Idar Stadheim tlf. 901 28 020. Epost: sporten@firda.no Oppdaterte sportsnyhender på firda.no/sporten



UT: Martin Andresen er kjent fotballprofil frå si tid på det norske landslaget, og for toppklubar som Brann og Vålerenga. No kjem han til Førde for å spele kvartfinale mot fire fordanarar i lag-NM i bridge i løpet av mars  
Arkivfoto: Stig Roger Eide

## Vil sende fotballprofil ut av NM-cupen

**BRIDGE:** – Målet er å påføre Martin Andresen eit tap, smiler Arild Hoff. I kvartfinalen i lag-NM i bridge møter nemleg Førde osloklubben TopBridge BC9 med Martin Andresen på laget.

**STIG ROGER EIDE**  
stig@firda.no 91149815

– Vi kan ikkje snakke om å stoppe kjeften på Martin Andresen her. For i bridge er han alltid audmjuk og sympatisk. På fotballbanen derimot er han ein heilt annan person, seier Arild Hoff som er kaptein på Førde-laget som har spelt seg fram til ein ny kvartfinale for klubblag. På laget spelar også

### Møter Martin Andresen i kvartfinalen i brigde-NM

Jens Sagevik, Geir Hjelmeland og Geir Hoff.

#### Kjem til Førde

– Vi var i finalen i fjor, og det hadde vore moro å kopiere den bedrifa. Men då må vi først sende Martin Andresen og hans lagkameratar heim med tap, seier Arild Hoff.

Endeleg kamptidspunkt for kvartfinaleoppgjernet mellom Førde og TopBridge BC9 er ikkje fastsett, men skal vere avvikla innan 27. mars.

– Vi har fordelen av å spele på heimebane, og det kan jo hende

at det vert ein kollisjon med tanke på Vålerenga Fotball og Martin Andresen når det gjeld bridge. Men når sant skal seiast, så trur eg kanskje han er den svakaste av dei fem spelarane TopBridge har på laget. Så det er kanskje ikkje eit tap om han prioriterer fotball, seier Arild Hoff.

#### EM-meister

Og Norges Bridgeforbund sin oversikt over stormeisterpoeng, stadfestar akkurat dette. For Martin Andresen har hittil berre sikra seg 195 poeng, medan bridgeprofilar som Sam Inge Høy-

land og Jon Aabye i same klubb har høvesvis 3353 og 2973 poeng, og begge har status som super-stormeister.

– Ein spelar som Sam Inge Høyland, som opphavleg kjem frå Gulen, har EM-tittel, og det er ikkje til å legge skjul på at dei er storfavorittar, seier Arild Hoff som er den spelaren i Førde Bridgelag som har flest poeng.

Klubben har så langt fire stormeistrar kor Arild Hoff toppar med 886, føre Geir Hjelmeland sine 816, Jens Sagevik med 744, medan Jonill Storøy er den siste med 704 poeng.

– Når det gjeld veslebror Geir så har han så langt berre 623 poeng. Så han har eit stykke igjen, smiler Arild Hoff og ser at dei fire Førde-spelarane har 3069 poeng totalt, medan dei fire beste TopBridge-spelarane har 7013.

– Men bridge handlar ikkje om matematikk. Det er fullt mogleg å avansere til semifinalen på ein god dag. Og det skal ikkje stå på motivasjonen. Og då er det sjølv sagt ekstra motiverande viss Martin Andresen kjem til Førde for å spele kvartfinalen. Då hadde det smakt ekstra godt å gå vidare til semien, seier Arild Hoff.